

前定錄續錄
袁氏傳
諾卑記
蔣子文傳
述異記
離魂記
三水小牘
續齊諧記
還寃記
古鏡記
枕中記
龍城錄

上冊



述

異

記

任昉撰

中華書局

述異記卷上

梁樂安任昉著 安義王軼纂校

昔盤古氏之死也。頭爲四岳。目爲日月。脂膏爲江海。毛髮爲草木。秦漢間俗說。盤古氏頭爲東岳。腹爲中岳。左臂爲南岳。右臂爲北岳。足爲西岳。先儒說。盤古氏泣爲江河。氣爲風。聲爲雷。目眇爲龍。古說。盤古氏喜爲晴。怒爲陰。吳楚間說。盤古氏夫妻陰陽之始也。今南海有盤古氏墓。亘三百餘里。俗云。後人追葬盤古之魂也。桂林有盤古氏廟。今人祀祀。

南海中盤古國。今人皆以盤古爲姓。防按盤古氏。天地萬物之祖也。然則生物始於盤古。

南海小虞山中有鬼母。能產天地鬼。一產十鬼。朝產之。暮食之。今蒼梧有鬼姑神是也。虎頭龍足。蟒目蛟眉。蛟眉連生。今吳越間防風廟。土木作其形。龍首牛耳。連眉一目。

昔禹會塗山。執玉帛者萬國。防風氏後至。禹誅之。其長三丈。其骨頭專車。今南中民有姓防風氏。卽其後也。皆長大。越俗祭防風神。奏防風古樂。截竹長三尺。吹之如嗚。三人披髮而舞。

軒轅之初立也。有蚩尤氏兄弟七十二人。銅頭鐵額。食鐵石。軒轅誅之於涿鹿之野。蚩尤能作雲霧。涿鹿今在冀州。有蚩尤神。俗云。人身牛蹄。四目六手。今冀州人掘地得燭髀如銅鐵者。卽蚩尤之骨也。今有蚩尤齒長二寸。堅不可碎。秦漢間說。蚩尤氏耳鬚如劍戟。頭有角。與軒轅鬪。以角抵人。人不能向。今冀州有

樂名蚩尤戲。其民兩兩三三頭戴牛角而相觝。漢造角觝戲。蓋其遺製也。

太原村落間祭蚩尤神。不用牛頭。今冀州有蚩尤川。卽涿鹿之野。漢武時。太原有蚩尤神畫見。龜足蛇首。首疫。其俗遂爲立祠。

堯使鯀治洪水。不勝其任。遂誅鯀於羽山。化爲黃能。反。來。入於羽泉。今會稽祭禹廟。不用熊。曰黃能卽黃熊也。陸居曰熊。水居曰能。防按。今江淮中有猷名熊。熊。蛇之精。至冬化爲雉。至夏復爲蛇。今吳中不食雉。毒故也。

揚州有地市。市人鬻珠玉而雜貨。蛟布。蛟人卽泉先也。又名泉客。

南海出蛟綃紗。泉先潛織。一名龍紗。其價百餘金。以爲服。入水不濡。

南海有龍綃宮。泉先織綃之處。綃有白如霜者。

鬱林郡有珊瑚市。海先市。珊瑚樹碧色。生海底。一株十枝。枝間無葉。大者高五六尺。至小者尺餘。蛟人云。海上有珊瑚宮。漢元封二年。鬱林郡獻瑞珊瑚。

光武時。南海獻珊瑚婦人。帝命植於殿前。謂之女珊瑚。一旦柯葉甚茂。至靈帝時。樹死。咸以謂漢室將亡之徵也。

凡珠有龍珠。龍所吐者。蛇珠。蛇所吐者。南海俗諺云。蛇珠千枚。不及玫瑰。言蛇珠賤也。玫瑰亦是美珠也。越人諺云。種千畝木奴。不如一龍珠。

越俗以珠爲上寶。生女謂之珠娘。生男謂之珠兒。吳越間俗說明珠一斛。貴如玉者。合浦有珠市。昔炎帝女溺死東海中。化爲精衛。其名自呼。每銜西山木石填東海。偶海燕而生子。生雌狀如精衛。生雄如海燕。今東海精衛誓水處。曾溺於此川。誓不飲其水。一名烏誓。一名冤禽。又名志鳥。俗呼帝女雀。東海島龍川。穆天子養八駿處也。島中有草名龍芻。馬食之一日千里。古語云。一株龍芻。化爲龍駒。陶唐之世。越裳國獻千歲神龜。方三尺餘。背上有文。皆科斗書。記開闢已來。帝命錄之。謂之龜曆。伏滔述帝功德。銘曰。胡書龜曆之文。

夏桀宮中有女子化爲龍。不可近。俄而復爲婦人。甚麗而食人。桀命爲蛟妾。告桀吉凶。桀時泰山山走石泣。先儒說。桀之將亡。泰山三日泣。今泰山山石遠望之。若人泣者是也。武王謂周公曰。桀爲不道。走山泣石。

堯爲仁君。一日十瑞。宮中鶴化爲禾。鳳凰止於庭。神龍見於宮沼。曆草生階。宮禽五色鳥。化白神木生蓮。蓬蒲生廚。景星耀於天。甘露降於地。是爲十瑞。

東海畔有孤竹焉。斬而復生。中有管。周武王時。孤竹之國獻瑞筍一株。空桑。生大野山中。爲琴瑟之最者。空桑也。

周成王元年。貝多國人獻舞雀。周公命返之。

南海中有軒轅丘。鸞自歌。鳳自舞。古云天帝樂也。

崆峒山中有堯碑禹碣，皆籀文焉。伏滔述帝功德，銘曰：堯碑禹碣，歷古不昧。

會稽山有虞舜巡狩臺，臺下有望陵祠。帝舜南巡，葬於九疑，民思之，立祠，曰望陵祠。

帝舜都邪門，古宮存焉。宮前有堯臺舜館，銘記古文，莫有識者。

湘水去岸三十里許，有相思宮，望帝臺。昔舜南巡而葬於蒼梧之野，堯之二女娥皇、女英，追之不及，相與慟哭，淚下沾竹，竹文上爲之斑斑然。

昔戰國時，魏國苦秦之難，有以民從征，戍秦久不返，妻思而卒，旣葬，塚上生木，枝葉皆向夫所在而傾。因名相思木。今秦趙間有相思草，狀如石竹而節節相續，一名斷腸草，又名愁婦草，亦名霜草，人呼爲寡婦莎，蓋相思之流也。

江南有懶婦魚，俗云昔楊氏家婦爲姑所溺而死，化爲魚焉。其脂膏可燃燈燭，以之照鳴琴，博奕，則爛然有光，及照紡績，則不復明焉。

水虺五百年化爲蛟，蛟千年化爲龍，龍五百年爲角龍，千年爲應龍。

沮渙二水，波紋皆若五色，彼人多文章，故一名積水。

灌漑之間，離別亭，古送別處。漢沔會流處，岸上有石銘云：下至水府，三十一里，皆傳云李斯刻此石。

鹿千年化爲蒼，又五百年化爲白，又五百年化爲玄。漢成帝時，中山人得玄鹿，烹而視之，骨皆黑色，仙者說玄鹿爲脯，食之壽二千歲。

餘千縣有白鹿。土人皆傳千年矣。晉成帝遣人捕得。有牌在角後。書云。漢元鼎二年臨江所獻白鹿。淮水中。黃雀至秋化爲蛤。春復爲黃雀。雀五百年化爲蜃蛤。

梓樹之精化爲青羊。生百年而紅。五百年而黃。又五百年而色蒼。又五百年而色白。

龜千年生毛。龜壽五千年。謂之神龜。萬年曰靈龜。

海魚千歲爲劍魚。一名琵琶魚。形如琵琶而善鳴。因以名焉。

漢中山有虎生角。道家云。虎千年則牙蛻而角生。

漢宣城郡守封邵。一旦忽化爲虎。食郡民。民呼之曰封使君。因去不復來。故時人語曰。無作封使君。生不

治民死食民。夫人無德而壽則爲虎。虎不食人。人化虎則食人。蓋恥其類而惡之。

獬之爲獸。狀如虎豹而小。始生還食其母。故曰梟獍。

濟陽山有麻姑登仙處。俗說山上千年金雞鳴。玉犬吠。

園閭夫人墓中。周迴八里。別館洞房。迤邐相屬。漆燈照爛。如日月焉。尤異者。金蚕玉燕。各千餘雙。

吳王夫差築姑蘇之臺。三年乃成。周旋詰屈。橫亘五里。崇飾土木。殫耗人力。宮妓數千人。上別立春宵宮。

爲長夜之飲。造千石酒鍾。夫差作天池。池中造青龍舟。舟中盛陳妓樂。日與西施爲水嬉。吳王於宮中作

海靈館。館娃閣。銅溝玉檻。宮之極極。珠玉飾之。

吳既滅越。棲勾踐於會稽之上。地方千里。勾踐得范蠡之謀。乃示民以耕桑。延四方之士。作臺於外。而館

賢士今會稽山有越王臺。今交州麻林一名紵林。勾踐種麻。將以弦弓。交州隸頭山。勾踐貯米於其上。春稍糠爲山。今會稽之上。有越王鑄劍洲。箭鏃洲。往往有得古箭鏃。蓋古制也。

廣州東界。有大夫文種之墓。墓下有石爲華表柱。石鶴一隻。種。卽越王勾踐之謀臣也。

洞庭湖中有釣洲。昔范蠡乘扁舟至此。遇風。止釣於洲上。刻石記焉。有一陂。陂中有范蠡魚。昔范蠡釣得大魚烹食之。小者放於陂中。陂邊有范蠡石牀。石硯。鈎鏃。范蠡宅在湖中。多桑紵英果。有海杏大如拳。苦菜。甘柚林。石壁上鑿兵書十篇。菘葑川皆范蠡手植之。定陶有范蠡千斛魚陂。木桃園。酸棗林。梧桐宮。在句容縣。傳云。吳別館。有楸梧成林焉。梧子可食。古樂府云。梧宮秋。吳王愁。是也。

闔閭墓中石銘云。吳王之夜室也。嗚呼。平吾君。○乘吾之邦。遷于重崗。維崗之陽。吾王之邦。今宜都有吳王射亭。木棠苑。木棠果名。似梨而甜。宜都七里溪。吳王射堂。堂之柱礎。皆如伏龜。袁宏官賦曰。海龜之礎。是也。

蒼頡墓在北海。呼爲藏書臺。周末發冢。得方玉石。上刻文八十字。當時莫識。遂藏之書府。至秦時。李斯識八字。云上天作命。皇辟迭王。至叔孫通。識十二字。

瀨鄉石堂。有老子篆書道德經五千字。蔡邕於其旁以隸書證之。

番禺有酸柿甜梅。李尤果賦。生物賦。偏梅甜柿酸。

漢章帝三年。子母笏生白虎殿前。時謂爲孝竹。羣臣獻孝竹頌。

越多橘柚園。越人歲多橘稅。謂橙橘戶。吳書闕尚表請除臣之橘籍是也。

越中有王氏之橘園。胡氏之梅山。賀氏之瓜丘。吳中有陸家白蓮。顧家班竹。趙有韓氏之酸棗。

中山有楸戶。棠楸木者。楸子爲竹器。漢書貨殖志。千年楸。

邯鄲有故宮基存焉。中有趙王之果園。梅李至冬而花。春得而食。

鄴中銅甌鄉。魏武帝陵下。銅甌石犬各二。古詩云。石犬不可吠。銅甌徒爾爲。

一說。香水在并州。其水香潔。浴之去病。吳故宮亦有香水溪。俗云。西施浴處。人呼爲脂粉塘。吳王宮人灌

粧於此溪上源。至今馨香。古詩云。安得香水泉。灌郎衣上塵。俗說魏武帝陵中亦有泉。謂之香水。

饒州俗傳。甘懷氏鑄鏡於湖邊。今有軒轅磨鏡石。石上常潔。不生蔓草。

桂林東南邊海。有裸川。桓譚新論云。呈衣冠於裸川。海上有裸人鄉。

丹陽大姑陵。陵下有石麟二枚。不知年代。傳云。秦漢間公卿墓。則以石麒麟鎮之。

虞氏縣有盧君古塚。塚旁柏二株。枝條蔭茂。二百餘步。樹文隱起。皆如龜甲。枝勁如銅石。

盧府君墓在館陶縣南二十里。不知何代。銘曰。盧府君歸真之室。

盧陵郡有董氏之宅。前有董家祠。昔有董氏語其鄉人曰。吾當盡室作神。及死。家人老幼皆卒。鄉人往往

見之。稱吾於地下作盧陵侯。鄉人因爲立祠。能致風雨。

安定西隴道。其谷中有彈箏之聲。行人過聞之。謂之彈箏谷。

粉水出房陵永清谷。取其水以漬粉。卽鮮潔有異於常。謂之粉水。

漢水西山有九井。井中常出五色煙。高數丈。傳云昔有人縊入。得數斛空青。

西海外有鵠國人。長七寸。日行千里。百獸不犯。惟畏海鵠。鵠見必吞之。在鵠腹中不死。鵠一舉亦千里。

吐綬鳥。其身大如鶴。五色。出巴東山中。毛色可愛。若天晴淑景。卽吐綬。長一尺。須臾還吞之。陰滯卽不吐。

陽泉。在天餘山北。清流數十步。所涵草木。皆化爲石。精明堅勁。其水所經之處。物皆漬爲石。

却塵犀。海獸也。然其角辟塵。置之於座。塵埃不入。

羊山上有燃石。其色黃而文理疏。以水沃之。便如煎沸。其上可炊烹。稍冷卽復以水沃之。

獬豸。獸中最大者。龍頭馬尾。虎爪。長四百尺。善走。以人爲食。遇有道君卽隱藏。無道君卽出食人。反。獬乙八

反乳。

辟寒香。丹丹國所出。漢武時入貢。每至大寒。於室焚之。暖氣翕然自外而入。人皆減衣。

迷穀。出招鶴搖山。亦名鶴山。其樹如穀。又如楮。其花四照。名曰迷穀。如佩之。令人不迷。

南康博都縣西。沿江有石室。名夢口穴。嘗有船人遇一人。通身黃衣。擔兩籠黃瓜。求寄載。過至崖下。此人

睡盤上。徑下崖。直入石穴中。船主初甚忿之。見其人入石穴。始知異。視盤上睡。悉是金矣。

曾參養母至孝。曾有玄鶴爲戎人所射。窮而歸參。參收養療治。瘡愈放之。後鶴夜到門外。參秉燭視鶴。雌

雄雙至。各銜明月珠。以置參家。

炎洲在南海中。上有風生獸。似豹。青色。大如狸。網取之。積薪數車。燒之不燃。鐵錘鍛頭數十下。乃死。以口向風。須臾便活。以石上莖蒲塞鼻。卽真死。取其腦和菊花服之。可壽五百歲。

南方有灾火山。四月生火。十二月火滅。火滅之後。草木皆生枝條。至火生。草木葉落。如中國寒時也。取此木以爲薪。燃之不燼。以其皮績之爲火浣布。

蘭陵山有井。異鳥巢其中。金翅而身黑。此鳥見卽大水。井不可窺。窺者盈歲輒死。

玉門西南有一國。國中有山石磻。子林切千枚。名爲霹靂磻。從春雷而磻滅。至秋磻盡。雷收復生。年年如此。

宣城蓋山有舒姑泉。俗傳有舒氏女。與父析薪。女坐泉處。忽牽挽不動。父遽告家。及再至其地。惟見清泉。滿然。其母曰。女好音樂。乃作弦歌。泉乃涌流。

搗衣山一名靈山。在瑯琊郡。山南絕險。巖有方石。昔有神女於此搗衣。其石明瑩。謂之玉女搗練石。

斗鄉西津有玉女岡。天當雨。輒先涌五色氣於石間。俗謂玉女披衣。

嶽川去玉門三千里。地塞多雪。著木石之上。皆融而甘。可以爲菓。嶽丘餽反

八方之荒有石鼓。其徑千里。撞之其音卽成雷也。天之中威於此。

秦始皇作石橋於海上。欲過海觀日出處。有神人驅石去不速。神人鞭之。皆流血。今石橋其色猶赤。

員嶠山名還丘。東有雲石。廣五百里。有蠶長七寸。黑色。有鱗角。以雪霜覆之。然後作繭。長一尺。其色五采。織爲文錦。入水不濡。

園客者濟陰人貌美邑人多欲妻之客終不娶常種五色香草積十餘年服食其實忽有五色蛾集香草上客薦之以布生華蠶焉至蠶時有一女自來助養蠶以香草食之得繭一百二十枚繭大如甕每一繭纒六七日絲方盡纒訖此女與客俱神仙去

并州妬女泉婦人不得醜粧綵服至其地必興雲雨一云是介推妹

齊桓公北征孤竹見人長尺具衣冠左祛而走於馬前管仲曰此山之神也名曰侖兒去竊王擊之君與則見也

和州歷陽淪爲湖昔有書生遇一老姥姥待之厚生謂姥曰此縣門石龜眼血出此地當陷爲湖姥數往視之門吏問姥姥具答之吏以朱點龜眼姥見之遂走上北山顯城遂陷焉今湖中有明府魚奴魚婢魚信安郡有石室山晉時王質伐木至見童子數人棊而歌質因聽之童子以一物與質如棊核質含之不覺餓俄童子謂曰何不去質起視斧柯盡爛既歸無復時人

螺亭在南康郡昔有一女採螺爲業曾宿此亭夜聞空中風雨聲乃見衆螺張口而至使亂噉其肉明日惟有骨存焉故號此亭爲螺亭

北方有七尺之聚南方有三尺之梨凡人不得見或見而食之卽爲地仙

荀瓊字叔偉潛棲卽粧嘗東遊憩江夏黃鶴樓上望西南有物飄然降自霄漢俄頃已至乃駕鶴之賓也鶴止戶側仙者就席羽衣虹裳賓主歡對已而辭去跨鶴騰空眇然而滅

晉安郡有一書生謝端，爲性介潔，不染聲色，嘗於海岸觀濤，得一大螺，大如一石米斛，剖之，中有美女，曰子天，漢中白水素女。天帝矜卿純正，令爲君作婦，端以爲妖，呵責遣之。女嘆息升雲而去。

東陽郡永康縣，吳時有人入山，逢大龜，擔之，未至家，遇夜，纒舟於岸，見老桑呼龜曰：元緒，汝當死矣。龜呼桑樹曰：子明無苦也。雖然，盡南山之樵，不能潰我。對曰：諸葛恪明敏，禍必及於子。明日，其人將龜獻吳王，命煮之，三日三夜不死，遂問諸葛恪。恪曰：此龜有精，須得多載老桑爲薪，煮之立爛。遂令以老桑斫之爲薪，既燃即爛。

漢武帝幸甘泉長平阪，道中有蟲，赤如肝，頭目口齒悉具，人莫知也。時東方朔曰：此古秦獄地也。積憂所致。上使按圖，果秦獄地。朔曰：夫積憂者得酒而解，乃取蟲置酒中，立消。

洞庭山有宮五門，東通林屋，西達峨眉，南接羅浮，北連岱岳。東有石樓，樓下兩石，扣之清越，所謂神鉦。昔有寺童，乘燭颺飛輪之車至此，其跡存焉。上有天帝壇，山有金牛穴。吳孫權時，令人掘金，金化爲牛，走上山，其跡存焉。故號爲金牛穴。

范文，本日南奴也。爲奴時，牧羊於澗中，得兩鯉魚，欲私食之。郎知詰之，文詐云：將曬石，還非魚也。郎至魚所，果見兩石，文異之。石有鐵文，因入山中，就治作兩刀，因舉刀向郗，郗卽善中山地名也。咒曰：鯉魚變化，治成刀，斫石郗破者，是有神靈。文嘗治此國，遂斫破之。衆遂推爲君。

宋武帝微時，伐荻於新洲，見一大地，長數丈，遂射之，傷。明日復往觀之，聞杵臼聲，覘見數青衣童子，攜藥。

問其故。答曰：我王爲劉寄奴所射。今合藥傅之。帝曰：何神也？童子不答。帝叱之，皆散。收得藥，人因名此草爲劉寄奴。

西域有鼠國。大者如豬，中者如兔，小者如常鼠。頭悉白，商賈有經過其國者，若不祈祀，則嚼人衣裳。周成王時，東夷送六角牛。

磅嶺山，去扶桑五萬里，日所不及。其地甚寒，有桃樹千圍，萬年一實。一說：日本國有金桃，其實重一斤。

委子闔閭葬於吳縣三月，有白虎居其上，號曰虎丘。

晉太康中，會稽縣蚺蜺及羊皆化爲鼠。蚺始變者，有毛而無肉，大食新稻。

周穆王時，天下連雨三月，穆王乃吹笛，其雨遂止。

漢武帝時，西方有日支國，獻活人草三莖。有人死者，將草覆面，卽活之矣。

封微山中有怒毛獸，若不噴，毛短三寸。若噴，毛長三尺。

南金山有獅子禽，其毛黃赤而光鮮，耳小。若鳴時，地動石裂。

崑崙山有玉桃，光明洞澈而堅瑩，須以玉井泉洗之，便軟可食。

北方荒外有石湖，方十里，中有橫公魚。夜卽化爲人，刺之不入，煮之不死。若以烏梅二七箇煮之，卽熟。可治邪病。

東海郡尉于台，有杏一株，花雜五色，六出，號云仙人杏。

晉時晉陵薛顯家有虹飲釜中水須臾而竭顯因以酒祝而益之虹復飲盡吐金滿釜而去顯家遂至大富。

顯潛山有報春鳥春至則鳴秋分亦鳴似題鳩之類也。

龍肝瓜長一尺花紅葉素生於冰谷所謂冰谷素葉之瓜。

越俗說會稽山夏禹廟中有梅梁忽一春而生枝葉。

漢成帝常與趙飛燕游太液池以沙棠木爲舟其木出崑崙崙山人食其實入水不溺詩曰安得沙棠木以爲舟船。

巴東有眞香茗其花白色如薔薇煎服令人不眠能誦無忘。

伺潮鷄潮水上則鳴孫綽望海賦曰石鷄清響而應潮是也。

聚窟洲有返魂樹伐其根心於玉釜中煮取汁又熬之令可丸名曰驚精香或名震靈丸或名反生香或名卻死香死尸在地聞氣即活。

岑華山在西海之西有蔓竹爲簫管吹之若羣鳳之鳴。

魏典錫巖山多生微蘅草有風不偃無風獨搖。

黃金山有楠樹一年東邊榮百邊枯後年西邊榮東邊枯年年如此張華云交讓樹也。

石勒嘗備於臨水爲遊軍所囚會有羣鹿傍道軍人競逐之勒乃獲免俄而又見一老父謂勒曰向來寧

鹿者我也。君應爲列國主。故相救耳。

大食王國。在西海中。有一方石。石上多樹。幹葉青。枝上繇生小兒。長六七寸。見人皆笑。動其手足。頭著樹枝。使摘一枝。小兒便死。

獬豸者。一角之羊也。性知人有罪。皋陶治獄。其罪疑者。令羊觸之。

取鳥之未生毛者。以丹和牛肉使吞。至長。羽毛皆赤。殺之。陰乾。杵服。壽五百歲。

鄧通以權船爲黃頭郎。曰。土勝水。其色黃。故刺船郎皆著黃帽。

漢元和元年。大雨。有一青龍墮於宮中。帝命烹之。賜羣臣龍羹各一杯。故李尤七命曰。味兼龍羹。案消山有石樓樹。吳太皇元年。郡吏伍躍於海際得之。枝莖紫色。有光。南越謂之石連理也。

南海有明珠。卽鯨魚目。鯨死。而目皆無精。夜可以察。謂之夜光。

千年木精爲青牛。

猿五百歲化爲猩。猩千歲化爲老人。

鵝生五百年而紅。五百年而黃。又五百年而蒼。又五百年而白。壽三千歲。

鸞千年生胡鬚。

虎魚老者爲蛟。

江中魚化爲蝗。而食五穀者。百歲爲鼠。

蛟羊似羊而無角。啖之毒。

古人說羊一名胡髯郎。又名青鳥。

周穆王之犬。日走千里。食虎豹。

閩閩構水精宮。尤極珍怪。皆出自水府。

瀨鄉老子祠。有紫石榴。紅縹李。一李二色。

勾漏縣。有白橘。青椒。縹杏。

南中生子母竹。今之慈竹也。

漢章帝元年。上虞縣獻二蒂瓜。一實二蒂。及玉色橘。

趙王故城。俗呼爲麋鹿城。

殷紂時。六龜生毛而兔生角。是兵甲將興之兆。

梁孝王築平臺。臺至今存。有兼葭洲。鳧藻洲。梳洗潭。中有望秦山。商人望鄉之處。

貝宮夫人廟。在太一山下。云懷元王夫人也。廟卽其基也。

雷陽南有龍川。鳳川。云漢武帝時。八龍五鳳。常見於此。亦呼爲五鳳州。

魏文帝甄后陵。在鄴中臨漳東北。至今有甄后神。